

# CBETA電子佛典集成

---

CBETA Chinese Electronic Tripitaka Collection  
eBook

X74n1471

## 華嚴清涼國師禮讚文

宋 智肱述

財團  
法人

佛教電子佛典基金會



# 目次

- [編輯說明](#)
- [章節目次](#)
- [卷目次](#)
  - 1,
- [贊助資訊](#)

## 編輯說明

- 本電子書以「CBETA 電子佛典集成 Version 2023.Q4」為資料來源。
- 漢字呈現以 Uni code 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 [service@cbeta.org](mailto:service@cbeta.org) 回報。
- 版權所有，歡迎自由流通，但禁止營利使用。

長水法孫(智肱)述

吾祖賢首國師。開宗判教。經窮一代。義絕百家。解釋唐則天聖后朝。所譯華嚴。至十九卷。大願未終。奄然真寂。清涼始登賢首法席。傳習起信等義。念學無常師。遂人詢北禮。法倣南求。負笈四方。擯經三學。復趨賢首絳紗。偶師遷化。師之門徒。雖高甲宗一慧苑慧英等輩。續其餘藁。皆不繫先古。清涼遽發慨然之歎。故別製新經疏二十卷(或開為四十卷)。隨經演義鈔四十卷。(或開六十卷或開八十卷)其疏鈔皆不違先師之意。賢首門生。實若星繁。白眉青眼。拔萃超群。道契緣符。心傳口授。獨清涼一蟾孤朗。大宋高僧傳。義解科中。藏師傳末云。華嚴一宗。付授澄觀(國師諱也)。又師撰隨文手鑑一百卷。華嚴綱要三卷。法界玄鏡一卷。鏡燈說文一卷。三聖圓融觀一卷。華嚴圓覺四分中觀等經律關脈三十餘部。華嚴七處九會華藏界圖。心鏡說文一卷。大經了義備要三卷。唐聖誕晨對御談經文。兼一家祖述。詩表牋章。總八十餘卷。斐相國云。古錦純金。隨器任用。良以投機授法。海應多波。奧義雅談。其歸一揆。歷九宗聖世。為七帝門師。俗壽一百八。僧臘八十三。形長九尺四寸。垂手過膝。日夜發光。晝仍不瞬。言論清雅。動止作則。才供二筆。凡著述見流傳者。四百餘卷。(云云)以國師地位高深。解行幽邃。力扶大教。智燭宏宗。縱浩博淵微之學。畢一代佛言者。賢首之後。襲有我師。功歸清涼也。每歲仲冬。諸方咸以賢首忌晨。專致讚供。諸祖附列而已。嘻推功祖德清涼當克獨祭近得甌越。的本傳神。宗密僧睿二法師。拱侍香几。冰姿高朗。風神超邁。巍峩若存。覲者畏愛。特輪長利。覓工傳寫。適三月初六日化旦。聊陳薄禱。雅多同學。咸扣余曰。盛致餽饌。缺如讚章。請從屬文。貴參古式。乃不揆禱昧。略伸讚詠。傳習華嚴疏鈔。祖述清涼章句者。推功企恩。力行祭享。不亦宜乎。每位用義龍為稱者。賢首初見雲華儼師。能設數問。皆出意表。儼師嗟曰。此來義龍輩。尚罕扣斯端。何計仁賢。發明耳目。又高僧慧榮自志曰。學習三十季。不號義龍。誓不歸迹。後果聲振彌遠。又清涼五臺華嚴疏。就夢身為龍。頭枕南臺。尾蟠北臺。化多分照而去。流通之吉兆也。又斐相國。奉勅作清涼妙覺塔銘。銘曰。勅俾圖形。相即無相。海印大龍。蟠居方丈。今此以義龍稱耳。若考清涼菩薩。功德難思。義龍何啻。初學無疑。

(行者入道場敷具禮三拜互跪秉爐唱云)。

恭以。通方妙術。終古冲規。遍七處九會。以常宣。具六相十玄。而廣說。義海之波瀾浩瀚。一極唱高。教門之詮旨圓融。二乘絕聽。毛分不移。而橫該法界。剎那無動。而豎貫長時。竭性相之洪源。徹果因之坦道。超眾典。比山推於峻嶽。攝群經。猶川注於窮溟。朗金烏。奪眾景之光。皎玉兔。掩餘星之彩。幽深匹測。祕密難思。非下地之能知。必上根而可入。爰自龍宮選妙鳳闕翻靈。雜華爛漫於西乾。具葉芬芳於東夏。無私駕說。五天迓惠於真風。不禦弘宣。萬國其霽於法雨。圓明主伴。代不乏人。應感聖凡。時新後哲。賢首始歌于白雪。清涼繼唱于陽春。本雄詮。開五教之蹊。體大法。導十宗之徑。示形禹族。降迹唐朝。慕花中瞻蔔之香。羨林內旃檀之貴。剃除鬚髮。拌弃衣簪。曠然出三界之家。豁爾寤四生之夢。辯才天縱。學問生知。為七帝之門師。歷九宗之聖世。德雲翬翬。名翼翩翩。綜緇侶以孤標。統僧倫而獨步。化緣寂處。將花殘柳謝之春。能事畢時。僅鸞囀鸞來之序。諱晨旦偶祭享宜陳略聲巴哩之詞。聊薦藻蘋之供。薄酬法乳。微報鴻恩。希道眼以洞明。冀他心而昭格。師資感應。水月光臨。鑒我虔誠。乞垂迓降。

(禮一拜起互跪秉爐請云)。

- 一心奉請。華嚴教海賢首義龍。第六祖師清涼尊者(三請三拜然後說偈)。

稽首華嚴菩薩海	普賢悲願久修心
四依德行妙通依	五地功熏難勝地
三觀已深超解脫	十身將證入圓融
分形普化寄唐朝	說法遍霑生禹族
聲震寰中咸軌範	名聞世表盡宗師
經龍律虎間生才	僧統國師曇萼瑞

(至此陳白不然則修一疏宣之)。

- 一心頂禮。華嚴教海賢首義龍。出胎分慶時身清涼尊者(從清涼字和之)。

四依應跡生王族	十月形成出聖胎
祥瑞希奇動眾心	光明煥赫驚鄰室
照世星眸藏襴襦	懸河海辯擁衣衾
善才法爾又童真	性德重開珍寶藏

故我一心歸命頂禮(下皆倣此)。

- 一心頂禮。華嚴教海賢首義龍。嬉童入寺時身清涼尊者。

福擬百童嚴塔像 嬉遊眾藝聚泥沙  
差無白馬詣青山 悅有寶林逾雲嶺  
掃灑六塵求解脫 躋攀四智學菩提  
一周歲曜發靈機 三藏微言皆曉達

- 一心頂禮。華嚴教海賢首義龍。奉恩落髮時身清涼尊者。

祝髮染緇除俗態 奉恩遵禁入僧倫  
金刀剪剪綠絲飄 玉璽輝輝黃勅鎮  
翠堵福超功德重 周羅髮盡垢塵輕  
形權心實妙難思 便是德雲從定起

- 一心頂禮。華嚴教海賢首義龍。群經注演時身清涼尊者。

調理筌筓遊智刃 從容科節銳詞鋒  
楞嚴圓覺洞能詮 般若涅槃明所解  
文錦江心垂玉鈞 義花浪底擲金鈎  
洪濤本意擷鯨鰲 十四輕罾方便設

- 一心頂禮。華嚴教海賢首義龍。精傳諸論時身清涼尊者。

宗釋覈(上革切)研咸秉志 深探慧學不師心  
十城封賞健螢牕 五日馳名工雪几  
起信瑜伽親指授 因明寶性力師承  
縱橫九論鼓聲雄 剛助肇公談四絕

- 一心頂禮。華嚴教海賢首義龍。優游觀法時身清涼尊者。

導達大方闢佛眼 澄淳衍行迥禪心  
蓮花止觀去情遊 法界色空亡相入  
台嶺明明藏智地 終山歷歷現心地  
還源深寂洗塵勞 忽證普光平等理

- 一心頂禮。華嚴教海賢首義龍。圓明眾戒時身清涼尊者。

本期補特皆成佛 纔淨尸羅福施生  
聲聞軌轍究端倪 菩薩車乘重控御  
律悟開遮偏妙處 戒登樓閣最高層  
十弘要(平聲)誓繫浮囊 三聚妍媸懸寶鑑



- 一心頂禮。華嚴教海賢首義龍。無名師證時身清涼尊者。

法界湛然超語迹	宗門離念以心傳
教窮源本達枝流	禪悟濬(私聞切)深參骨髓
虛寂觀中空寂趣	無名師表離名求
洞明說默兩鎔融	豈比筭沙徒自困

- 一心頂禮。華嚴教海賢首義龍。聞經能演時身清涼尊者。

盡詫涅槃心易曉	誰醒(平聲)差別智難明
不乘圓滿大因輪	曷到汪洋真果海
無盡指歸觀掌上	難思法術印胸中
再周能演動說言	法界洪規今在汝

- 一心頂禮。華嚴教海賢首義龍。五峯祈請時身清涼尊者。

聖智冥加祈寶積	威神與力藉龍尊
十年麟筆貫花心	五頂鳳牋標月志
真侶懇求敷創義	法師開拓演新文
赤髭白足兩弘真	瓶瀉雲興良可喻

- 一心頂禮。華嚴教海賢首義龍。通儒助釋時身清涼尊者。

俗學無裨雖佛誠	道儒會釋始通方
本操五教作權衡	兼握九經為斟酌
道德逍遙莊老志	詩書仁義孔顏心
四圍章句五明宗	十翼百家咸顧習

- 一心頂禮。華嚴教海賢首義龍。疏成感夢時身清涼尊者。

法食慶文猶吐鳳	傳芳吉兆夢成龍
輝空鱗鬣亘雙臺	耀世光明逾皦日
奮迅侃梭昭變化	分飛雷劒識流通
百川入海味同醎	製錦操刀功不淺

- 一心頂禮。華嚴教海賢首義龍。箋經普化時身清涼尊者。

五色雲凝天上瑞	八方人擁地中仙
九州慶溢扇慈風	四海遐飛霑法雨
絳帳揮松傳百眾	覺堂談柄烈千徒

名曹大手盡樞衣 殉命奔趨求發藥

- 一心頂禮。華嚴教海賢首義龍。群英雜述時身清涼尊者。

述義屬文遺輔相 摘毫麗藻惠公卿  
七家貴宦笥珠珍 十寺名僧囊錦繡  
二要五篇三聖觀 諸關雙鏡九經圖  
蟠根聳本雜花功 布葉垂陰章句力

- 一心頂禮。華嚴教海賢首義龍。新經譯贊時身清涼尊者。

增輝妙理因烏茶 聖叡同翻預譯場  
講贊何煩夢易(入聲)頭 弘通不假仙呼藥  
花開錦上重重媚 雲起長空片片新  
聖法高談悟帝心 國師仍賜清涼號

- 一心頂禮。華嚴教海賢首義龍。談真歷遇時身清涼尊者。

壽永九宗天子世 德高七帝國王師  
四方卓犖拜先生 三教清英推首坐  
葵藿心傾光俗諦 桑榆日晚暢真猷  
詩章賤表動嚴宸 對御談經欣慶會

- 一心頂禮。華嚴教海賢首義龍。韜光順寂時身清涼尊者。

緣盡四心同有滅 韜光三月示無常  
重臣縞素愴賢心 皇帝輟朝悽聖意  
石室葬龕蒙國禮 興唐塑兒動天文  
闍維舌固朵紅蓮 舍利數千光色潤

(至此復跪秉爐運想披陳五悔)。

普為四恩。三有法界眾生。悉願斷除三障。歸命懺悔(或運逆順十心於理無爽)。

至心懺悔

忽忘廣大毗盧性 妄躍無涯苦海津  
波蕩千華本佛心 漚成五蘊眾生相  
十身妙好拘形殼 十智光明墮惑情  
一法纔迷萬法迷 一塵暫起諸塵起  
頓差三德成三毒 豈達凡心即聖心  
十剎常光瞽不窺 十方遍說聾無聽  
雖登毗奈如狂象 已屬摩羅若啞羊



六相全虧朗智燈 十玄鎮缺懸明鏡  
百非四句增輕謗 萬劫千生結重愆  
我體真空觀慧門 全修全性圓融懺

懺悔已至心歸命三寶(下皆例此)。

至心勸請

毛孔微塵容佛處 剎那劫海說經時  
鏡光帝網道場中 願轉法輪窮後際

至心隨喜

十方三世微塵佛 八相圓成眾善根  
六道諸乘行願因 隨喜皆修功德海

至心回向

願學普賢深信解 圓修萬行等虛空  
菩提實際與眾生 回向湛然真法界

至心發願

不捨千輪功德海 常持十本大華嚴  
普招群品剖塵經 遍拉眾生剷識藏  
在果在因能說法 居凡居聖善修心  
即於普眼見遮那 不離普賢觀妙德  
三聖圓融歸當念 十身無礙應塵方  
未來劫剎道場中 等願法王稱長子

- 自歸於佛。當願眾生。體解大道。發無上意。
- 自歸於法。當願眾生。深入經藏。智慧如海。
- 自歸於僧。當願眾生。統理大眾。一切無礙。

華嚴清涼國師禮讚文一卷

---

## CBETA 贊助資訊

[. \(https://www.cbeta.org/donation/index.php\)](https://www.cbeta.org/donation/index.php)

CBETA 成立於 1998 年，於 2023 年 8 月 7 日轉型成為基金會。成立多年來，一部部佛典在嚴謹控管中轉換為數位典藏，不只數量龐大，而且文字校訂精確可信，又加新式標點方便閱讀。「CBETA 電子佛典集成」不僅獲得國際學界的重視及肯定，也成為大眾廣為運用的公共資源，如此成果都是在廣大信眾及有識之士的支持下才得以實現。

對一個從事佛法志業的非營利團隊，能夠長期埋首理想、踏實耕耘是非常不容易的。如今，CBETA 運作經費日漸拮据，但「佛典集成」仍有許多未竟之功。因此，懇請大家慷慨解囊、熱情贊助，讓未來有更多更好的電子佛典。

您的捐款本會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

---

## 信用卡線上捐款

本線上捐款與 netiCRM 及 NewbPay 藍新金流合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

不管您持有的是國內或國外卡，所有捐款最終將以新台幣結算，所以我們所開立的捐款收據也將以新台幣計。

線上刷卡支持定期定額與單筆捐款。（銀聯卡不支援定期定額）

## [前往捐款](#)

---

### 劃撥捐款

郵政劃撥帳號: 5 0 4 6 8 2 8 5

戶名: 財團法人佛教電子佛典基金會

欲指定特殊用途者, 請特別註明, 我們會專款專用。

---

### 線上信用卡 / PayPal 捐款

PayPal 是一個跨國線上付款機制的公司, CBETA 引用其服務, 提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project .

相關收據開立事宜, 由於付款幣別為美元, 我們除了會依您所贊助之美元金額開立收據外, 另我們會依捐款當日公告匯率開立台幣收據, 此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

### [線上信用卡 / PayPal 贊助](#)

---

## 支票捐款

支票抬頭請填寫「財團法人佛教電子佛典基金會」。

For donations by check, please write the check to  
"Comprehensive Buddhist Electronic Text Archive  
Foundation".

---